

明嘉靖

缺五卷八出



正集全册

五〇年

信...

臺新

廣州購書

中國

但終

十月十日

刻玉臺新詠序



新安吳世忠

撰

竹藻東海徐陵以綺靡之材會風人之體
其於製作則列陰何擘如斐如鸞立江表
金石所流望之有餘綽而可喜俾摘藻之
徒偶以賈餘遂仍失故以是知陵其天縱
麗容精妙無雙者也陵才類傾城又性好
色因以捧心自媚巧笑殊工攄懷吐實於
斯特切雖閒放者肆其滑稽馴雅者申其

名瀆正變爽常愉怨各指槩得規之大道
不愧於風人核其微旨獨何畧焉管鑣潛
通此秘幸覩群籍具在釋而不剛後有作
者其不以我為迷乎直代非一人人非一
詠事不要撮音本雜懸菁蕪混塞復有可
說匪斷其禁齋族而理之亦難升于鼎俎
之場膾炙人口也則叅以師洎之耳裁以
王尔之斤翰墨填委曷契予衷彙其尤者
播爲新詠義屬宮禁片言而必錄事關妓

妾累牘而不遺間或以結褵膠漆或以異
地參商乖協千狀淫則兩途而已曰士曰
女爽兮剛柔亦有君臣堂陛靡較儻在善
鳴舉入其選履端炎漢卒以齊梁六百餘
年文姬墨卿弱婦哲夫追琢之美文繡不
如輦聚于絢煌煌乎充上乘矣若夫柏梁
甘泉之製芝房寶鼎之歌被之津呂塞耳
鏗鉤與此殊科姑未暇論自陵漁獵滋博
殆盡秋毫考類居半瑜瑾倍之縱不純德

比騁妙林陶冶之匠珍為藝模而中更樸
學繩之過當以為文動萬乘辯却三軍力
可排山氣能貫日斯人皆文武挺出竝有
剛腸者也而俄然心摧化為繞指歷九折
而不悔顧一笑而私憐出擁節旄入沈社
席何以聲明潤于金石功烈炳于丹青乎
柔從不覺浸以成俗士氣下衰王迹陵夷
稽之二南奚啻千里哉折衷先典異乎所
聞昔齊王好色孟軻廣之武公善譖衛國

頌焉詩譽譎諫道通委巷必欲操竿絕瑟
庸得其平且靈修美人以媿國君宓妃佚
女賢臣是譬文固有托視我靈均此而莫
保波為作俑下逮涂泐寄遠辭隱以端斑
女幽宮志哀而婉婦言尚爾餘可輕之總
其大都婚媾之際嗟嘆嬋媛是不一致故
每當座而情飛或驅鋒而辭利窮日以思
繼若有餘崇朝立就咸謂警策國風以懷
春作劇楚臣以東鄰自持獲附娥眉纔盡

薄技持以擅場來自疇昔屢致意而不厭
連巨篇而爲短苟親筆札未之能釋豈如
郊廟之幽鐘鼎質木旣削繁文安所潤色
者乎陵之是編備采宮商好醜不掩寧納
下流將貽大匠故置之席上煥若奇珍奏
之房中聿興化國方今五緯順軌三事脩
文乘運躍鱗優游金馬奏御且千鍾風宗
雅將復古道必先異書而是編殘簡甚訛
曾莫校讐頃有方生敬明挾策遠遊購此

閱市厥交梧埜鄭君受以銀布廣之四方
甫竣而生已長逝宵爲異物悲夫鄭君又
沿陵以下益之陳隋披卷寓目海不拘珠
昔史記緝于少孫班表終于大家前事未
忘君復匹之非涂氏之子雲千載同聲而
何哉嘉靖己亥十二月八日

刻玉臺新詠序
新安方弘靜撰
夫詩緣情而作者也情莫近乎妃匹之間
故三百篇首關雎寤寐窈窕發乎情止乎
禮義是以知先王之澤風化之本也及王
迹既熄鄭衛競鳴詞人之作恣乎麗艷有
異是焉迺若北方佳人一顧傾國邛鄴少
女獨立無雙浣紗溪邊千人為之嘆息采
桑道側五馬以之踟躕漢帝阿嬌貯之黃

刻玉臺新詠序

新安方弘靜撰

夫詩緣情而作者也情莫近乎妃匹之間
故三百篇首關雎寤寐窈窕發乎情止乎
禮義是以知先王之澤風化之本也及王
迹既熄鄭衛競鳴詞人之作恣乎麗艷有
異是焉迺若北方佳人一顧傾國邛鄴少
女獨立無雙浣紗溪邊千人為之嘆息采
桑道側五馬以之踟躕漢帝阿嬌貯之黃

金之屋石家娉婷買以十斛之珠吁可動
乎其天下之至靡也至夫春華方豔秋月
俄輝白日未移紅顏將斂君王不御蕩子
忘歸長信宮深羞乞大夫之賦昭陽風起
忽聞弦管之聲玉堦苔生菱鏡長掩又何
寥乎其幽瘁也夫文魚比之比目則歡愛
可知匹鳥辟之孤棲若離愁何盡樂莫樂
焉憂莫憂焉是以文人才子詠其美艷之
情忠臣烈士痛其枯槁之狀語冶容宛僂

人來下言寂寞雖戾夫戲欵作者接軌咸
歸二途綵筆盈懷錦帙溢篋矣有陳東海
徐君於是搜諸藝府無慮百家萃彼豔歌
類為十卷千花競映掩赤城之春霞萬寶
皆縣燦玄圃之玉樹挾蔡椀之奇有如重
璧貴洛紙之價何啻三都若乃揆之風人
格以雅訓殆有可言者矣爾若霍家馮都
之篇秦氏羅敷之詠秋胡之妻玉壺比潔
隴西之婦齊姜不如婕妤託意於紈扇蘭

芝委體於清池抱貞白而莫渝與皎月而
爭色漢廣行露又何過焉蓋亦什一千百
矣至如相如求鳳貽辱於清評繁欽定情
無閑於貞則子夜吳歌盡寫放蕩之思江
南雜弄率多淫佚之詞挑葉團扇縱情於
內箒舸郎溪女相調於中流王謝高蹤於
斯賤矣故采其合雅象流金之在沙究其
離經異白璧之微玷昔尼父刪詩疵媿並
著桑間濮上存而不棄所以明風刺示懲

誠也述者之意豈類斯乎且摘藻風雲動
情心目勸風百一其來遠矣夫道無二津
情則萬委詞波類海各指所之若文攷其
世是則頌列女也若德放其辭固非訓內
則也亦何譏哉故知留連彤管信有賢於
博奕彈誚閑情諒見非於來哲矣鄭君梧
野以名家公子綽有雅懷揖當代才流馳
其高駕得抄本於上都撫殘篇而動色爰
迺廣逸拾遺續為外集併刻山堂傳諸寰

內使芸閣棲遲將無勞於柏葉巾箱展翫
何自苦於蠅頭其不負徐君之用心矣乎
嘉靖己亥十二月二十日

玉臺新詠序

陳尚書左僕射太子少傅東海徐陵撰
陵雲槩曰由余之所未窺千門萬戶張衡之所
會賦周王璧臺之上漢帝金屋之中玉樹以珊
瑚作枝珠簾以玳瑁爲柙其中有麗人焉其人
五陵豪族充選掖庭四姓良家馳名求巷亦有
穎川新市河澗觀津本號嬌娥曾名巧笑楚王
宮內無不推其細腰衛國佳人俱言訝其纖手
閱詩敦禮非直東鄰之自媒婉約風流無異西
施之被教弟兄協律自小學歌少長河陽由來

能舞琵琶新曲無待石崇篋篋雜引非因曹植
傳鼓瑟於楊家得吹簫於秦女至若寵聞長樂
陳后知而不平畫出天仙闕氏覽而遙妬至如
東鄰巧笑來侍寢於更衣西子微顰將橫陳於
甲帳陪游馭娑騁纖腰於結風長樂鴛鴦奏新
聲於度曲裝鳴蟬之薄鬢照墮馬之垂鬟反插
金鈿橫抽寶樹南都石黛最發雙蛾北地燕脂
偏開兩靨亦有嶺上仙童分九魏帝腰中寶鳳
授曆軒轅金星與婺女爭華麝月共嫦娥競爽
驚鸞冶袖時飄韓掾之香飛燕長裾宜結陳王

之珮雖非圖畫入甘泉而不分言異神仙戲陽
臺而無別真可謂傾國傾城無對無雙者也加
以天時開朗逸思雕華妙解文章尤工詩賦琉
璃硯匣終日隨身翡翠筆牀無時離手清文蒲
篋非唯芍藥之花新製連篇寧止蒲萄之樹九
日登高時有緣情之作萬年公主非無累德之
辭其佳麗也如彼其才情也如此既而椒房宛
轉柘館陰岑絳鶴晨嚴銅螽畫靜三星未久不
事懷衾五日猶余誰能理曲優游少託寂寞多
閑厭長樂之踈鍾勞中宮之緩箭輕身無力怯

南陽之擣衣生長深宮笑扶風之織錦雖復投
壺玉女爲懽盡於百嬌爭博齊姬心賞窮於六
著無怡神於暇景唯屬意於新詩可得代彼萱
蘇微蠲愁疾但徃世名篇當今巧製分諸麟閣
散在鴻都不藉篇章無由披覽於是燃脂瞑寫
弄墨晨書撰錄艷歌凡爲十卷曾無參於雅頌
亦靡濫於風人涇渭之間若斯而已於是麗以
金箱裝之寶軸三臺妙迹龍伸蠖屈之書五色
花牋河北膠東之紙高樓紅粉仍定魚魯之文
辟惡生香聊防羽陵之蠹雲飛六甲高擅玉函

鴻烈仙方長推丹枕至如青牛帳裏餘曲未終
朱鳥窓前新裝已竟方當開茲縹帙散此緇繩
永對玩於書帷長循環於織手豈如鄧學春秋
儒者之功難習竇專黃老金丹之術不成固勝
西蜀豪家託情窮於魯殿東儲甲觀流詠止於
洞簫變彼諸姬聊同棄日猗與彤管無或譏焉

武帝

文帝

陳思王

明帝

陳琳

徐幹

王宋

晉

阮籍

賈充

張載

孫綽

傅玄

張華

潘岳

石崇

左思

陸機

宋

王獻之

桃葉

張協

楊方

王鑑

李充

曹毗

陶潛

宋

孝武帝

荀杲

王徽

謝靈運

謝惠連

劉鑠

王僧達

顏延年

鮑昭

湯惠休

張融

王素

吳邁遠

許瑤

鮑令暉

管景

齊

丘巨源

王融

謝朓

陸厥

虞炎

邢邵

虞羲

釋寶月

梁

武帝

昭明太子

簡文帝

元帝

邵陵王

武陵王

范雲

江淹

丘遲

沈約

柳惲

施泰榮

江洪

高爽

何子朗

虞騫

范靜婦沈氏

何遜

王樞

吳筠

庾丹

王僧孺

張率

徐悱

徐悱妻劉氏

費昶

姚翻

孔翁歸

何思澄

湯僧濟

王環

徐勉

楊燾

蕭子顯

蕭子雲

蕭子輝

蕭子範

蕭愨

王筠

劉孝綽

劉孝儀

劉孝威

劉遵

王訓

庾肩吾

王臺卿

庾成師

徐君倩

鮑泉

劉綏

鄧鏗

陰鏗

甄固

劉邈

東江伯瑤

紀少喻

聞人蒨

吳孜

王叔英妻劉氏

戴嵩

朱超道

裴子野

房篆

陸壘

陳

後主

徐陵

蕭麟

何曼才

謝燮

許倪

祖孫登

周弘正

沈君攸

張正見

陸瓊

陸系

江總

賈馮吉

蕭淳

蕭琳

沈炯

劉刪

吳思玄

蘇子卿

吳尚野

顧野王

徐堪

荀仲舉

何楫

王瑳

盧詢

李元操

徐伯陽

岑之敬

賀徹

陳達

殷謀

傅緯

陳少女

北魏

裴讓之

王容

王德

周南

北齊

馮淑妃

魏收

蕭放

馬元熙

北周

明帝

庾信

蕭撝

王褒

名家世序

煬帝

盧思道

薛道衡

辛德源

虞茂

松公瞻

李巨仁

張文恭

何妥

王春

魏彥深

丁六娘

陳伯材

僧法宣

李月素

羅愛愛

秦玉鸞

蘇蟬翼

張碧蘭

蘓軾翼

李白素

羅受受

刺前林

曾志宣

駿發系

丁六敬

何安

王春

李自斗

蕭文恭

真效

蘇公顯

趙希

辛密感

謝帝

盧思道

名家世序終

玉臺新詠卷一目錄

班婕妤

陳東海徐陵編

古詩八首

古樂府

日出東南隅行

蘓相逢狹路間

隴西行

李艷歌行

皚如山上雪

雙白鵠

枚乘

雜詩九首

李延年

歌詩并序

蘇武

留別妻作

辛延年

古羽林郎

班婕妤

怨詩并序

宋子侯

董嬌嬈

漢時童謠歌一首

張衡

同聲歌

秦嘉

贈婦詩三首

徐淑

答夫秦嘉一首

蔡邕

玉臺新詠卷一目錄
飲馬長城窟行

繁欽

定情篇

無名氏

為焦仲卿妻 并序

玉臺新詠卷一目錄終

玉臺新詠卷一

長安鄭振鐸 陳東海徐陵編 明歛方大法校

古詩八首

其一

兩如韻

上山採蘼蕪下山逢故夫長跪問故夫新人復何如新人雖言好未若故人姝顏色類相似手爪不相如新人從門入故人從門去新人工織縑故人工織素織縑日一匹織素五丈餘將縑來比素新人不如故

其二

玉臺新詠卷一

憶憶歲云暮，蟋蟀多鳴悲。涼風率已厲，遊子寒
無衣。錦衾遺洛浦，同袍與我違。獨宿累長夜，夢
想見容輝。良人惟古歡，枉駕惠前綏。願得常巧
笑，携手同車歸。既來不須臾，又不處重闈。諒無
晨風翼，焉能陵風飛。眄眄以適意，引領遙相睎。
徙倚懷感傷，垂涕沾雙扉。

一兩韻

其三

冉冉孤生竹，結根泰山阿。與君爲新婚，菟絲附
女蘿。菟絲生有時，夫婦會有宜。千里遠結婚，悠
悠隔山陂。思君令人老，軒車來何遲。傷彼蕙蘭
花，含英揚光暉。過時而不採，將隨秋草萎。君亮
執高節，賤妾亦何爲。

其四

孟冬寒氣至，北風何慘慄。愁多知夜長，仰觀衆
星列。三五明月滿，四五蟾兔缺。客從遠方來，遺
我一書札。上言長相思，下言久離別。置書懷袖
中，三歲字不滅。一心抱區區，懼君不識察。

其五

客從遠方來，遺我一端綺。相去萬餘里，故人心
尚爾。文彩雙鴛鴦，裁爲合歡被。着以長相思，綠

以結不解以膠投漆中誰能別離此

其六

四坐且莫誼願聽歌一言請說銅爐器崔嵬象
南山土枝似松栢下根據銅盤雕文各異類離
婁自相聯誰能爲此器公輸與魯班朱火然其
中青煙颺其間從風入君懷四坐且莫歡香風
難久居空令蕙草殘

其七

悲與親友別氣結不能言贈子以自愛道遠會
見難人生無幾時顛沛在其間念子棄我去新

心有所歡結志青雲上何時復來還

其八

穆穆清風至吹我羅裳裾青袍似春草長條隨
風舒朝登津梁山褰裳望所思安得抱柱信皎
日以爲期

日出東南隅行

古樂府

日出東南隅照我秦氏樓秦氏有好女自言名
羅敷羅敷善蠶桑採桑城南隅青絲爲籠繩桂
枝爲籠鉤頭上倭墮髻耳中明月珠綠綺爲下
裳紫綺爲上襦行者見羅敷下擔捋髭鬚少年

見羅敷脫帽著幘頭耕者忘其耕鋤者忘其鋤
來歸相怨怒但坐觀羅敷使君從南來五馬立
踟躕使君遣吏往問此誰家姝答云秦氏女且
言名羅敷羅敷年幾何二十尚未滿十五頗有
餘使君謝羅敷寧可共載不羅敷前置辭使君
一何愚使君自有婦羅敷自有夫東方千餘騎
夫婿居上頭何以識夫婿白馬從驪駒青絲繫
馬尾黃金絡馬頭腰間鹿盧劍可直千萬餘十
五府小吏二十朝大夫三十侍中郎四十專城
居爲人潔白皙鬢鬢頗有鬚盈盈公府步冉冉

府中趨坐數千人皆言夫婿殊

相逢狹路間

相逢狹路間道隘不容車如何兩少年挾轂問
君家君家誠易知易知復難忘黃金爲君門白
玉爲君堂堂上置樽酒使作邯鄲倡中庭生桂
樹華燭何煌煌兄弟兩三人中子爲侍郎五日
一來遊道上自生光黃金絡馬頭觀者滿路傍
入門時左顧但見雙鴛鴦鴛鴦七十二羅列自
成行音聲何嗵嗵鶴鳴東西廂大婦織羅綺中
婦織流黃小婦無所作挾瑟上高堂丈人且安

坐調絲方未央

隴西行

天上何所有歷歷種白榆
桂樹夾道生青龍對道隅
鳳凰鳴啾啾一母將九雛
顧視世間人爲樂甚獨殊
好婦出迎客顏色正敷愉
伸腰再拜跪問客平安不請客
北堂上坐客羶氎氍毹清白
各異樽酒止正華䟽酌酒持
與客客言主人持却畧再拜
跪然後持一盃談笑未及竟
左顧勅中厨促令辨麤飯
慎莫使稽留廢禮送客出盈
盈府中趨送客亦不遠足不
過門樞取婦得如

此齊姜亦不如健婦持門戶勝一大丈夫

艷歌行

翩翩堂前鷺冬藏夏來見
兄弟兩三人流蕩在他縣
故衣誰爲補新衣誰當綻
賴得賢主人覽取爲吾組
夫婿從門來斜倚西北眄
語卿且勿眄水清石自見
石見何纍纍遠行不如歸

皚如山上雪

皚如山上雪皎若雲間月
聞君有兩意故來相訣絕
平生共城中何嘗斗酒會
今日斗酒會明日溝水頭
蹀躞御溝上溝水東西流
郭東亦有

樵郭西亦有樵兩樵相推與無親爲誰驕淒淒
復淒淒嫁娶不須啼頭得一心人白頭不相離
竹竿何嫋嫋魚尾何蕤蕤男兒重意氣何用錢
刀爲齒如馬噉箕川上高士嬉今日相對樂延
年萬歲期

雙白鵠

飛來雙白鵠乃從西北來十十將五五羅列行
不齊忽然卒疲病不能飛相隨五里一反顧六
里一徘徊吾欲銜汝去口噤不能開吾欲負汝
去羽毛日摧頽樂哉新相知憂來生別離踟躕

顧羣侶淚落縱橫垂今日樂相樂延年萬歲期

雜詩九首

枚乘

其一

西北有高樓上與浮雲齊交疏結綺窓阿閣三
重階上有絃歌聲音響一何悲誰能爲此曲無
乃杞梁妻清商隨風發中曲正徘徊一彈再三
嘆慷慨有餘哀不惜歌者苦但傷知音稀願爲
雙鴻鵠奮翅起高飛

其二

東城高且長逶迤自相屬迴風動地起秋草萋

已綠四時更變化。歲暮一何速。晨風懷苦心。蟋蟀傷局促。蕩滌放情志。何爲自結束。燕趙多佳人。美者顏如玉。被服羅裳衣。當戶理清曲。音響一何悲。絃急知柱促。馳情整巾帶。沉吟聊躑躅。思爲雙飛燕。銜泥巢君屋。

其三

行行重行行。與君生別離。相去萬餘里。各在天一涯。道路阻且長。會面安可知。胡馬嘶北風。越鳥巢南枝。相去日已遠。衣帶日已緩。浮雲蔽白日。遊子不顧返。思君令人老。歲月忽已晚。棄捐勿復道。努力加食飯。

其四

涉江採芙蓉。蘭澤多芳草。採之欲遺誰。所思在遠道。還顧望舊鄉。長路漫浩浩。同心而離居。憂傷以終老。

其五

青青河畔草。鬱鬱園中柳。盈盈樓上女。皎皎當窗牖。娥娥紅粉粧。纖纖出素手。昔爲倡家女。今爲蕩子婦。蕩子行不歸。空牀難獨守。

其六

蘭若生春陽。涉冬猶盛滋。願言追昔愛。情歎感
四時。美人在雲端。天路隔無期。夜光照玄陰。長
嘆戀所思。誰謂我無憂。積念發狂癡。

其七

庭前有奇樹。綠葉發華滋。攀條折其榮。將以遺
所思。馨香盈懷袖。路遠莫致之。此物何足貴。但
感別經時。

其八

迢迢牽牛星。皎皎河漢女。纖纖擢素手。札札弄
機杼。終日不成章。泣涕零如雨。河漢清且淺。相

去復幾許。盈盈一水間。脉脉不得語。

其九

明月何皎皎。照我羅裳幃。憂愁不能寐。攬衣起
徘徊。行客雖云樂。不如早旋歸。出戶獨彷徨。愁
思當告誰。引領還入房。淚下沾裳衣。

歌詩一首 并序

李延年

李延年知音善歌舞。每爲漢武帝作新歌。變曲
聞者莫不感動。延年侍坐上。起舞歌曰。
北方有佳人。絕世而獨立。一顧傾人城。再顧傾
人國。傾城復傾國。佳人難再得。

留別妻一首

蘇武

結髮爲夫妻恩愛兩不疑
懽娛在今夕嫵婉及良時
征夫懷遠路起視夜何其
參辰皆已沒去從此辭行役
在戰場相見未有期握手一長
歎淚爲生別滋努力愛春華
莫忘懽樂時生當復來歸死
當長相思

羽林郎

辛延年

昔有霍家奴姓馮名子都
依倚將軍勢調笑酒家胡
胡姬年十五春日獨當壚
長裾連理帶廣袖合歡襦
頭上藍田玉耳後大秦珠
兩鬟何窈窕

窈一世良所無一鬟五百萬
兩鬟千萬餘不意金吾子
娉婷過我廬銀鞍何煜爚
翠蓋空踟躕就我求清酒
絲繩提玉壺就我求珍肴
金盤鱠鯉魚貽我清銅鏡
結我紅羅裾不惜紅羅裂
何論輕賤軀男兒愛後婦
女子重前夫人生有新故
貴賤不相踰多謝金吾子
私愛徒區區

怨詩并序

班婕妤

昔漢成帝班婕妤失寵
供養於長信宮乃作賦自傷
并爲怨詩一首
新裂齊紈素鮮潔如霜雪
裁爲合歡扇團圓似

明月出入君懷袖動搖微風發常恐秋節至涼
風奪炎熱棄捐篋笥中情中道絕

董嬌嬈

宋子侯

洛陽城東路桃李生路傍花花自相對葉葉自
相當春風東北起花葉正低昂不知誰家子提
籠行採桑纖手折其枝花落何飄颺請謝彼姝
子何爲見損傷高秋八九月白露變爲霜終年
會飄墮安得久馨香秋時自零落春月復芬芳
何時盛年去歡愛永相忘吾欲竟此曲此曲愁
人腸歸來酌美酒挾瑟上高堂

童謠歌一首

漢時

城中好高髻四方高一尺城中好大眉四方皆
半額城中好廣袖四方用匹帛

同聲歌

張衡

邂逅承際會得充君後房情好新交接恐慄若
探湯不才勉自竭賤妾職所當綢繆主中饋奉
禮助蒸嘗思爲莞蒨席在下蔽匡牀願爲羅衾
幃在上衛風霜洒掃清枕席鞮芬以秋香重戶
結金扃高下華燈光衣鮮巾粉御列圖陳枕張
素女爲我師儀態盈萬方衆夫所希見天老教

軒皇樂莫斯夜樂沒齒焉可忘

贈婦詩三首 并序

秦嘉

秦嘉字士會隴西人也爲郡上掾其妻徐淑寢疾還家不獲面別贈詩云爾

其一

人生譬朝露居世多屯蹇憂艱常早至歡會常苦晚念當奉時役去爾日遙遠遣車迎子還空往復空返省書情悽愴臨食不能飮獨坐空房中誰與相勸勉長夜不能眠伏枕獨展轉憂來如尋環匪席不可卷

其二

皇靈無私親爲善荷天祿傷我與爾身少小罹熒獨旣得結大義歡樂苦不足念當遠離別思念叙欸曲河廣無舟梁道近隔丘陸臨路懷惆悵中駕正躑躅浮雲起高山悲風激深谷良馬不迴鞍輕車不轉轂針藥可屢進愁思難爲數貞士篤終始恩義不可促

其三

肅肅僕夫征鏘鏘揚和鈴清晨當引邁束帶侍雞鳴顧看空室中髮髯想姿形一別懷禹恨起

坐爲不寧何用叙我心遺思致款誠寶釵好耀
首明鏡可鑒形芳香去垢穢素琴有清聲詩人
感木瓜乃欲答瑤瓊愧彼贈我厚慙此往物輕
雖知未足報貴用叙我情

答夫秦嘉一首

徐淑

妾身兮不令嬰疾兮來歸沉滯兮家門歷時兮
不差曠廢兮侍覲情敬兮有違君兮奉命遠
適兮京師悠悠兮離別無因兮叙懷瞻望兮踟
躕佇立兮徘徊思君兮感結夢想兮容輝君發
兮引邁去我兮日乖恨無兮羽翼高飛兮相追

長吟兮求歎淚下兮沾衣

飲馬長城窟行一首

蔡邕

青青河邊草綿綿思遠道遠道不可思宿昔夢
見之夢見在我旁忽覺在他鄉他鄉各異縣展
轉不相見枯桑知天風海水知天寒入門各自
媚誰肯相爲言客從遠方來遺我雙鯉魚呼兒
烹鯉魚中有尺素書長跪讀素書書中竟何如
上有加飡食下有長相憶

定情詩篇一首

繁欽

我出東門遊邂逅承清塵思君即幽房侍寢執

衣巾時無桑中契迫此路側人我旣媚君姿君
亦悅我顏何以致拳拳縮臂雙金釵何以致殷
勤約指一雙銀何以致區區耳中雙明珠何以
致叩叩香囊繫肘後何以致契闊繞腕雙跳脫
何以結恩情美玉綴羅纓何以結中心素縷連
雙針何以結相投金薄畫搔頭何以慰別離耳
後玳瑁釵何以答歡悅紈素三條裾何以結愁
悲白絹雙中衣與我期何所乃期東山隅日旰
兮不來谷風吹我襦遠望無所見涕泣起踟躕
與我期何所乃期山南陽日中兮不來凱風吹

我裳逍遙莫誰覩望君愁我腸與我期何所乃
期西山側日夕兮不來躑躅長歎息遠望涼風
至俯仰正衣服與我期何所乃期山北岑日暮
兮不來淒風吹我衿望君不能坐悲苦愁我心
愛身以何爲惜我華色時中情旣歎歎然後尅
密期褰衣躡茂草謂君不我欺廁此醜陋質徒
倚無所之自傷失所欲淚下如連絲

古詩爲焦仲卿妻作

并序

無名氏

漢末建安中廬江府小吏焦仲卿妻劉氏爲仲
卿母所遣自誓不嫁其家逼之乃沒水而死仲

卿聞之亦自縊於庭樹時傷之爲詩云爾

古詩

孔雀東南飛五里一徘徊十三能織素十四學
裁衣十五彈箜篌十六誦詩書十七爲君婦心
中常苦悲君旣爲府吏守節情不移賤妾留空
房相見常日稀雞鳴入機織夜夜不得息三日
斷五疋大人故嫌遲非爲織作遲君家婦難爲
妾不堪驅使徒留無所施便可白公姥及時相
遣歸府吏得聞之堂上啓阿母兒已薄祿相幸
復得此婦結髮同枕席黃泉共爲友共事三二

年始爾未爲久女行無偏斜何意致不厚阿母
謂府吏何乃太區區此婦無禮節舉動自專由
吾意久懷忿汝豈得自由東家有賢女自名秦
羅敷可憐體無比阿母爲汝求便可速遣之遣
去慎莫留府吏長跪告伏惟啓阿母今若遣此
婦終老不復取阿母得聞之槌牀便大怒小子
無所畏何敢助婦語吾已失恩義會不相從許
府吏默無聲再拜還入戶舉言謂新婦哽咽不
能語我自不驅卿逼迫有阿母卿但暫還家吾
今且報府不久當歸還還必相迎取以此下心

意慎勿違吾語新婦謂府吏勿復重紛紜往昔
初陽歲謝家來貴門奉事循公姥進止敢自尊
晝夜勤作息伶俜縈苦辛謂言無罪過供養卒
大恩仍更被驅遣何言復來還妾有繡腰襦葳
蕤自生光紅羅複斗帳四角垂香囊箱簾六七
十綠碧青絲繩物物各自異種種在其中人賤
物亦鄙不足迎後人留待作遺施於今無會因
時時爲安慰久久莫相忘雞鳴外欲曙新婦起
嚴粧着我繡袂裙事事四五通足下躡絲履頭
上玳瑁光腰若流紈素耳著明月璫指如削葱

根口如含朱丹纖纖作細步精妙世無雙上堂
拜阿母阿母怒不止昔作女兒時生小出野里
本自無教訓兼愧貴家子受母錢帛多不堪母
驅使今日還家去念母勞家裏却與小姑別淚
落連珠子新婦初來時小姑始扶牀今日被驅
遣小姑如我長勤心養公姥好自相扶將初七
及下九嬉戲莫相忘出門登車去涕落百餘行
府吏馬在前新婦車在後隱隱何甸甸俱會大
道口下馬入車中低頭共耳語誓不相隔鄉且
暫歸家去吾今且赴府不久當還歸誓天不相

負新婦謂府吏感君區區懷君既若見錄不久
望君來君當作盤石妾當作蒲葦蒲葦紉如絲
盤石無轉移我有親父兄性行暴如雷恐不任
我意逆以前煎我懷舉手長勞勞二情同依依入
門上家堂進退無顏儀阿母大拊掌不啻子自
歸十三教汝織十四能裁衣十五彈箜篌十六
知禮儀十七遣汝嫁謂言無誓違汝今何罪過
不迎而自歸蘭芝慙阿母兒實無罪過阿母大
悲摧還家十餘日縣令遣媒來云有第三郎窈
窕世無雙年始十八九便言多令才阿母謂阿

女汝可去應之阿女含淚答蘭芝初還時府吏
見丁寧結誓不別離今日違情義恐此事非奇
自可斷來信徐徐更謂之阿母白媒人貧賤有
此女始適還家門不堪吏人婦豈合令郎君幸
可廣問訊不可便相許媒人去數日尋遣丞請
還說有蘭家女承籍有宦官云有第五郎嬌逸
未有婚遣丞爲媒人主簿通語言直說太守家
有此令郎君既欲結大義故遣來貴門阿母謝
媒人女子先有誓老姥豈敢言阿兄得聞之悵
然心中煩舉言謂阿妹作計何不量先嫁得府

更後嫁得郎君否泰如天地足以榮汝身不嫁
義郎體其住欲何云蘭芝仰頭答理實如兄言
謝家事夫婿中道還兄門處分適兄意那得自
任專雖與府吏要渠會求無緣登即相許和便
可作婚姻媒人下牀去諾諾復爾爾還部白府
君下官奉使命言談大有緣府君得聞之心中
大歡喜視曆復開書便利此月內六合正相應
良吉三十日今已二十七卿可去成婚交語速
裝束絡驛如浮雲青雀白鵠舫四角龍子幡
婀娜隨風轉金車玉作輪躑躅青驄馬流蘇金鏤

鞍齋錢三百萬皆用青絲穿雜綵三百疋交用
市鮭珍從人四五百鬱鬱登郡門阿母謂阿女
適得府君書明日來迎汝何不作衣裳莫令事
不舉阿女默無聲手巾掩口啼淚落便如瀉移
我琉璃榻出置前牕下左手持刀尺右手執綾
羅朝成繡袂裙晚成單羅衫晻晻日欲暝愁思
出門啼府吏聞此變因求假暫歸未至二三里
摧藏馬悲哀新婦識馬聲躡履相逢迎悵然遙
相望知是故人來舉手拍馬鞍嗟嘆使心傷自
君別我後人事不可量果不如先願又非君所

詳我有親父母逼迫兼弟兄以我應他人君還
何所望府吏謂新婦賀卿得高遷盤石方且厚
可以卒千年蒲葦一時紉便作旦夕間卿當曰
勝貴吾獨向黃泉新婦謂府吏何意出此言同
是被逼迫君爾妾亦然黃泉下相見勿違今日
言執手分道去各各還家門生人作死別恨恨
那可論念與世間辭千萬不復全府吏還家去
上堂拜阿母今日大風寒寒風摧樹木嚴霜結
庭蘭兒今日冥冥令母在後單故作不良計勿
復怨鬼神命如南山石四體康且直阿母得聞

之零淚應聲落汝是大家子仕宦於臺閣慎勿
爲婦死貴賤情何薄東家有賢女窈窕艷成郭
阿母爲汝求便復在旦夕府吏再拜還長嘆空
房中作計乃爾立轉頭向戶裏漸見愁煎迫其
日牛馬嘶新婦入青廬菴菴黃昏後寂寂人定
初我命絕今日魂去尸長留攬裙脫絲履舉身
赴青池府吏聞此事心知長別離徘徊顧樹下
自掛東南枝兩家求合葬合葬華山傍東西植
松柏左右種梧桐枝枝相覆蓋葉葉相交通中
有雙飛鳥自名爲鴛鴦仰頭相向鳴夜夜達五

更行人駐足聽寡婦起傍徨多謝後世人戒之
慎勿忘

玉臺新詠卷一終

玉臺新詠卷二目錄

陳東海徐陵編

魏武帝

塘上行

魏文帝

清河見輓船士新婚與妻別作

又清河作一首

魏陳思王

雜詩五首

美女篇

採葛篇

浮萍篇

棄婦篇

魏明帝

樂府 二首

陳琳

飲馬長城窟行

徐幹

雜詩 五首

室思

情詩

王宋

雜詩 二首

玉臺新詠卷二目錄終

玉臺新詠卷二

陳東海徐陵編

明歙方大法校

塘上行

魏武帝

蒲生我池中其葉何離離
傍能行仁義莫若妾
自知衆口鑠黃金使君生別離
念君去我時獨
愁常苦悲想見君顏色感結傷心脾
念君常苦
悲夜夜不能寐莫以豪賢故棄捐
素所愛莫以
魚肉賤棄捐葱與薤莫以麻枲賤棄捐
管與蒯
出亦復苦愁入亦復苦愁邊地多悲風
樹木何
修修從君致獨樂延年壽千秋

清河見輓船士新婚與妻別作

魏文帝

與君結新婚宿昔當別離涼風動秋草蟋蟀鳴
相隨列列寒蟬吟蟬吟抱枯枝枯枝時飛揚身
體忽遷移不悲身遷移但惜歲月馳歲月無窮
極會合安可知願爲雙黃鵠比翼戲清池

又清河作

方舟戲長水湛淡自浮沉絃歌發中流悲響有
餘音音聲入君懷悽愴傷人心心傷安所念但
願恩情深願爲晨風鳥雙飛翔北林

雜詩 五首

陳思王

其一

明月照高樓流光正徘徊上有愁思婦悲歎有
餘哀借問歎者誰言是宓子妻君行踰十年孤
妾常獨栖君若清路塵妾若濁水泥浮沉各異
勢會合何時諧願爲西南風長逝入君懷君懷
良不開妾心當何依

其二

西北有織婦綺縞何繽紛明晨秉機杼日昃不
成文太息終長夜悲嘯入清雲妾身守空房良

人行從軍自期三年歸今已歷九春孤鳥繞林
翔嗷嗷鳴索羣願爲南流景馳光見我君

其三

微陰翳陽景清風飄我衣遊魚潛綠水翔鳥薄
天飛眇眇客行士遙役不得歸始出嚴霜結今
來白露晞遊子歎黍離處者歌式微慷慨對嘉
賓悽愴內傷悲

其四

攬衣出中閨逍遙步兩楹閑房何寂寞綠草被
堦庭空室自生風百鳥翩南征春思安可忘憂

感與我并佳人在遠道妾身單且玆懽會難再
遇蘭芝不重榮人皆棄舊愛君豈若平生寄松
爲女蘿依水如浮萍束身奉衿帶朝夕不墮傾
儻能終顧盼永副我中情

其五

南國有佳人容華若桃李朝遊江北岸夕宿湘
川沚時俗薄朱顏誰爲發皓齒俛仰歲將暮榮
曜難永恃

姜女篇

姜女妖且閑採桑岐路間柔條紛冉冉落葉何

翩翩攘袖見素手皓腕約金環頭上金雀釵腰
佩翠琅玕明珠交玉體珊瑚間木難羅衣何飄
飄輕裾隨風還顧盼遺光彩長嘯氣若蘭行徒
用息駕休者以忘飡借問女安居乃在城南端
青樓臨大路高門結重關容華輝朝日誰不希
令顏媒氏何所營玉帛不時安佳人慕高義求
賢良獨難衆人徒嗷嗷安知彼所權盛年處幽
室中夜起長歎

種葛篇

種葛南山下葛蔓自成陰與君初婚時結髮恩

義深歡愛在枕席宿昔同衾竊暮棠棣篇好
樂如瑟琴行年將晚暮佳人懷異心恩紀曠不
接我情遂抑沉出門當何顧徘徊步北林下有
交頸獸仰見雙栖禽攀枝長歎息淚下沾羅衿
良馬知我愁延頸對我吟昔爲同池魚今若商
與參徃古皆歡遇我獨困于今棄置委天命悲
愁安可任

浮萍篇

浮萍寄清水隨風東西流結髮辭嚴親來爲君
子仇恪勤在朝夕無端獲罪尤在昔蒙恩惠和

樂如瑟琴何意今摧頽曠若商與參茱萸自有
芳不若桂與蘭新人雖可愛無若故人歡行雲
有返期君恩儻中還慊慊仰天歎愁心將何愬
日月不常處人生忽若寓悲風來入懷淚落如
垂露發篋造新衣裁縫紈與素

棄婦篇

石榴直前庭綠葉搖縹青丹華灼烈烈惟彩有
光榮光榮擘流離可以處淑靈有鳥來集樹飛
翼以悲鳴夫何爲丹華丹華實不成拊心長歎
息無子當歸寧有子月經天無子若流星天月

相終始流星沒無精栖遲失所宜下與瓦石并
憂懷從中來歎息通雞鳴反側不能寐逍遙於
前庭踟躕還入房肅肅帷幕聲褰幃更攝帶撫
絃彈素箏慷慨有餘音要妙悲且清收淚長歎
息何以負神靈招搖待霜露何必春夏成晚獲
爲良實願君且安寧

樂府 二首

魏明帝

其一

昭昭素明月輝光燭我牀憂人不能寐耿耿夜
何長微風衝閨闥羅帷自飄颺攬衣曳長帶縱

履下高堂東西安所之徘徊以徬徨春鳥何南
飛翩翩獨翱翔悲聲命儔匹哀鳴傷我腸感物
懷所思泣涕忽沾裳佇立吐高吟舒憤訴穹蒼

其二

種瓜東井上冉冉自踰垣與君新爲婚瓜葛相
結連寄託不肖軀有如倚太山菟絲無根株蔓
延自登緣萍藻託清流常恐身不全被蒙丘山
惠賤妾執拳拳天日照知之想君亦俱然

飲馬長城窟行

陳琳

飲馬長城窟水寒傷馬骨往謂長城吏慎莫稽

留太原卒官作自有程舉築諧汝聲男兒寧當
格鬪死何能怫鬱築長城長城何連連連連三
千里邊城多健兒內舍多寡婦作書與內舍便
嫁莫留住善事新姑嫜時時念我故夫子報書
與邊地君今出語一何鄙身在禍難中何爲稽
留他家子生兒慎莫舉生女哺用脯君獨不見
長城下死人骸骨相撐拄結髮行事君慊慊心
意閒明知邊地苦賤妾何能久自全

雜詩 五首

徐幹

其一

沉陰結愁憂愁憂為誰與念與君相別各在天
一方良會未有期中心摧且傷不聊憂食食慊
慊常飢空端坐而無為髣髴君容光

其二

峩峩高山首悠悠萬里道君去日已遠鬱結令
人老人生一世間忽若暮春草時不可再得何
為自愁惱每誦昔鴻恩賤軀焉足保

其三

浮雲何洋洋願因通我辭飄飄不可寄徒倚徒
相思人離皆復會君獨無返期自君之出矣明

鏡暗不治思君如流水何有窮已時

其四

慘慘時節盡蘭華凋復零喟然長歎息君期慰
我情展轉不能寐長夜何綿綿躡履起出戶仰
觀三星連自恨志不遂泣涕如涌泉

其五

思君見巾櫛以益我勞勤安得鴻鸞羽觀此心
中人誠心亮不遂搔首立悄悄何言一不見復
會無因緣故然比目魚今隔如參辰

室思

人靡不有初想君能終之別來歷年歲舊恩何
可期重新而忘故君子所猶譏寄身雖在遠豈
忘君湏史既厚不爲薄想君時見思

情詩

高殿鬱崇崇廣厦凄冷冷微風起閨闥落日照
階庭踟躕雲屋下笑歌倚華楹君行殊不返我
飾爲誰榮鑪薰闔不用鏡匣上塵生綺羅失常
色金翠暗無精嘉肴既忘御旨酒亦常停顧瞻
空寂寂惟聞鸞雀聲憂思連相屬中心如宿醒

雜詩

二首并序

王宋

王宋者平虜將軍劉勲妻也後勲悅山陽
司馬氏女以宋無子出之還于道中賦此

其一

翩翩牀前帳張以蔽光暉昔將爾同去今將爾
同歸緘藏篋笥裡當復何時披

其二

誰言去婦薄去婦情更重千里不唾井况乃昔
所奉遠望未爲遙踟躕不得并

玉臺新詠卷二終

玉臺新詠卷二目錄

陳東海徐陵編

阮籍

詠懷詩二首

傅玄

青青河畔草篇

苦相篇

有女篇

朝時篇

明月篇

玉臺新詠卷二目錄

秋蘭篇

西長安行

和秋胡行

張華

情詩 五首

雜詩 二首

潘岳

內顧詩 二首

悼亡詩 二首

石崇

王昭君辭 并序

左思

嬌女詩

陸機

擬行行重行行

擬迢迢牽牛星

擬明月何皓皓

擬蘭若生朝陽

擬東城一何高

擬庭中有奇樹

擬青青河畔草

擬涉江採芙蓉

為顧彥先贈婦二首

周夫人贈車騎

艷歌行

前緩聲歌

塘上行

陸雲

為顧彥先贈婦二首

張協

雜詩

揚方

合歡詩二首

雜詩三首

王鑑

七夕觀織女

李充

嘲友人

曹毗

夜聽擣衣

陶潛

擬古詩

玉臺新詠卷三目錄終

玉臺新詠卷三

陳東海徐陵編 明歙方大法校

詠懷詩二首

阮籍

其一

二妃遊江濱逍遙從風翔交甫解環珮婉孌有
芬芳猗靡情歡愛千載不相忘傾城迷下蔡容
好結中腸感激生憂思萱草樹蘭房膏沐爲誰
施其雨怨朝陽如何金石交一旦更離傷

其二

昔日繁華子安陵與龍陽天天桃李花灼灼有

輝光悅懌若九春
磬折似秋霜
流盼發媚姿
言笑吐芬芳
携手等歡愛
宿昔同衾裳
願爲雙飛鳥
比翼共翱翔
丹青著明誓
永世不相忘

青青河邊草篇

傳玄

青青河邊草
悠悠萬里道
草生在春時
遠道還
有期春至草不生
期盡歎無聲
感物懷思心
夢想發中情
夢君如鴛鴦
比翼雲間翔
既覺寂無見
曠如參與商
夢君結同心
比翼遊北林
既覺寂無見
曠如商與參
河洛自用固
不如中岳安
回流不及返
浮雲徃自還
悲風動思心
悠悠誰知者
懸景無停居
忽如馳駟馬
傾耳懷音響
轉日淚雙墮
生存無會期
要君黃泉下

苦相篇

苦相身爲女
卑陋難再陳
男兒當門戶
墮地自生神
雄心志四海
萬里望風塵
女育無欣愛
不爲家所珍
長大逃深室
藏頭羞見人
垂淚適他鄉
忽如雨絕雲
低頭和顏色
素頰結朱唇
跪拜無復數
婢妾如嚴賓
情合雙雲漢
葵藿仰陽春
心乖甚水火
百惡集其身
玉顏隨年變
丈夫多好新
昔爲形與影
今爲胡與秦
胡秦時相見

絕踰參辰

有女篇

有女懷芬芳提提步東廂蛾眉分翠羽明目發
清揚丹唇翳皓齒秀色若珪璋巧笑露權靨衆
媚不可詳容儀希世出無乃古毛嬙頭安金步
搖耳繫明月璫珠環約素腕翠爵垂鮮光文袍
綴藻黼玉體映羅裳容華既以艷志節擬秋霜
徽音冠青雲聲響流四方妙哉英媛德宜配侯
與王靈應萬世合日月時相望媒氏陳束帛羔
鴈鳴前堂百兩盈中路起若鸞鳳翔凡夫徒踴

躡望絕殊參商

朝時篇

昭昭朝時日皎皎晨明月十五入君門一別終
華髮同心忽異離曠若胡與越胡越有會時參
辰遼且闊形影雖髣髴音聲寂無達纖絃感促
柱觸之哀聲發情思如循環憂來不可遏塗山
有餘恨詩人詠採葛蜻蛚吟牀下回風起幽闈
春榮隨露落芙蓉生木末自傷命不遇良辰永
乖別已爾可柰何譬如紈素裂孤雌翔故巢星
流光景絕蒐神馳萬里甘心要同穴

明月篇

皎皎明月光灼灼朝日輝昔爲春蚕絲今爲秋
女衣丹脣列素齒翠彩發蛾眉嬌子多好言歡
合易爲姿玉顏盛有時秀色隨年衰常恐新聞
舊變故興細微浮萍無根本非水將何依憂喜
更相接樂極還自悲

秋蘭篇

秋蘭蔭玉池池水清且芳芙蓉隨風發中有雙
鴛鴦雙魚自踴躍兩鳥時回翔君期歷九秋與
妾同衣裳

西長安行

所思兮何在乃在西長安何用存問妾香橙雙
珠環何用重存問羽爵翠琅玕今我兮聞君更
有兮異心香亦不可燒環亦不可沉香燒日有
歇環沈日自深

和秋胡行

秋胡納令室三日宦他鄉皎皎潔婦姿泠泠守
空房嫵婉不終夕別如參與商憂來猶四海易
感難可防人言生日短愁者苦夜長百草揚春
華攘腕採柔桑素手尋繁枝落葉不盈筐羅衣

翳玉體迴目流彩章君子倦任歸車馬如龍驤
精誠馳萬里既去兩相忘行人悅令色借息此
路傍誘以逢卿喻遂下黃金裝烈烈貞女忿言
辭厲秋霜長驅及居室奉金升北堂毋立呼婦
來歡情樂未央秋胡見此婦惕然懷探湯負心
豈不慙求誓非所望清濁自異源鳧鳳不並翔
引身赴長流果哉絜婦腸彼夫既不淑此婦亦

太剛

情詩 五首

張華

其一

北方有佳人端坐鼓鳴琴終晨撫管絃日夕不
成音憂來結不解我思存所欽君子尋時役幽
妾懷苦辛初爲三載別於今久滯淫昔耶生戶
牖庭內自成陰翔鳥鳴翠隅草虫相和吟心悲
易感激俛仰淚流衿願託晨風翼束帶侍衣衾

其二

明月曜清景曩光照玄墀幽人守靜夜迴身入
空帷束帶俟將朝廓落晨星稀寢假交精爽覲
我佳人姿巧笑媚懽靨聯娟眸與眉寐言增長
歎悽然心獨悲

其三

清風動帷簾晨月燭幽房佳人處遐遠蘭室無
容光衿懷擁虛景輕衾覆空床居懽惜夜促在
感怨宵長撫枕獨吟歎綿綿心內傷

其四

君居北海陽妾在江南陰懸邈修塗遠山川阻
且深承懽注隆愛結分投所欽銜恩篤守義萬
里託微心

其五

遊目四野外逍遙獨延佇蘭蕙緣清渠繁華蔭

綠渚佳人不在茲取此欲誰與巢居覺風寒穴
處識陰雨未曾遠別離安知慕儔侶

雜詩二首

其一

逍遙遊春空容與綠池阿白蘋開素葉朱草茂
丹華微風搖菡若增波動芰荷榮彩曜中林流
馨入綺羅王孫遊不歸修路邈以遐誰與翫遺
芳佇立獨咨嗟

其二

荏苒日月運寒暑忽流易同好逝不存迢迢遠

離拆房櫳自來風戶庭無行迹蒹葭生床下蛛
螿網四壁懷思豈不隆感物重鬱積遊鴈比翼
翔歸鴻知接翮來哉彼君子無愁徒自隔

潘岳內顧詩二首

潘岳

其一

靜居懷所懼登城望四澤春草鬱青青桑柘何
奕奕芳林振朱榮淥水激素石初征冰未泮忽
然衫絺綌漫漫三千里迢迢遠行客馳情戀朱
顏寸陰過盈尺夜愁極清晨朝悲終日夕山川
信悠求願言良弗獲引領訊歸雲沉思不可釋

其二

獨悲安所慕人生若朝露綿邈寄絕域眷戀想
平素爾情既來追我心亦還顧形體隔不達精
爽交中路不見山下松隆冬不易故不見澗邊
栢歲寒守一度無謂希見踈在遠分彌固

悼亡詩二首

其一

荏苒冬春謝寒暑忽流易之子歸窮泉重壤永
幽隔私懷誰克從淹留亦何益僂俛恭朝命迴
心返初役望廬思其人入室想所歷幃屏無髣

鬢翰墨有餘迹流芳未及歇遺挂猶在壁悵恍
如或存周遑忡驚惕如彼翰林鳥雙棲一朝隻
如彼遊川魚比目中路析春風緣隙來晨露依
簷滴寢息何時忘沈憂日盈積庶幾有時哀莊
缶猶可擊

其二

皎皎窓中月照我室南端清商應秋至溽暑隨
節闌凜凜涼風升始覺夏衾單豈曰無重續誰
與同歲寒歲寒無與同朗月何朧朧展轉眄枕
席長簟竟床空床空委清塵室虛來悲風獨無

李氏靈彷彿覩爾容撫衿長歎息不覺涕沾曾
沾曾安能已悲歎從中起寢興目存形遺音猶
在耳上慙東門吳下愧蒙莊子賦詩欲言志零
落具難紀命也可柰何長戚自令鄙

王昭君辭

并序

石崇

王明君者本名王昭君以觸文帝諱故改
匈奴盛請婚於漢元帝詔以後宮良家子
明君配焉昔公主嫁烏孫令琵琶馬上作
樂以慰其道路之思其送明君亦必爾也
其新造之曲多哀聲故叙之于帟云爾

我本漢家子將適單于庭辭決未及終前驅已
抗旌僕御涕流離轅馬悲且鳴哀鬱傷五內泣
淚沾朱纓行行日已遠遂造匈奴城延我于窮
廬加我閼氏名殊類非所安雖貴非所榮父子
見陵辱對之慙且驚殺身良未易默默以苟生
苟生亦何聊積思常憤盈願假飛鴻翼乘之以
遐征飛鴻不我顧佇立以屏營昔爲匣中玉今
爲糞上英朝華不足歡甘與秋草并傳語後世
人遠嫁難爲情

嬌女詩

左思

吾家有嬌女皎皎頗白皙小字爲織素口齒自
清歷髮髮覆廣額雙耳似連璧明朝弄梳臺黛
眉類掃迹濃朱衍丹脣黃吻瀾漫赤嬌女若連
瑣忿速乃明愷握筆利彤管篆刻未期益執書
愛綈素誦習矜所獲其姊字惠芳兩目燦如畫
輕粧喜樓邊臨鏡忘紡績舉觶擬京兆立的成
復易玩弄眉頰間劇兼機杼役從容好趙舞延
袖像飛翮上下絃柱際文史輒卷襞顧盼屏風
畫如見已指擿丹青日塵闇明義爲隱蹟馳驚
翔園林菓下皆生摘紅葩掇紫蒂萍實驟抵擲

貪華風雨中倏忽數百適務躡霜雪戲重綦常
累積并心注肴饌端坐理盤榻翰墨戢閑按相
與數離逖動爲鑪鉦屈屣履任之適止爲茶菽
據吹噓對鼎鑿脂膩漫白袖煙薰染阿錫衣破
皆重施難與沈水碧任其孺子意羞受長者責
瞥聞當與杖淚淹俱向壁

擬行行重行行

陸機

悠悠行邁遠戚戚憂思深此思亦何思思君徽
與音音微日夜離緬邈若飛沉王鮪懷河岫晨
風思北林遊子眇天末還期不可尋驚飈褰反

信歸雲難寄音佇立想萬里沈憂萃我心攬衣
有餘帶循形不盈衿去去遺情累安處撫清琴

擬迢迢牽牛星

昭昭清漢暉粲粲光天步牽牛西北迴織女東
南顧華容一何冶揮手如振素怨彼河無梁悲
此年歲暮跂彼無良緣睨焉不得度引領望大
川雙涕如沾露

擬明月何皎皎

安寢北堂上明月入我牖照之有餘暉攬之不
盈手涼風繞曲房寒蟬鳴高柳踟躕感節物我

行永已久遊宦會無成離思難常守

擬蘭若生朝陽

嘉樹生朝陽疑霜封其條執心守時信歲寒終
不彫美人何其曠灼灼在雲霄隆想彌年月長
嘯入飛颺引領望天末譬彼向陽翹

擬東城一何高

西山何其峻曾曲鬱崔嵬零露彌天墜蕙葉憑
林衰寒暑相因襲時逝忽如頽三閭結飛轡大
耄嗟落暉曷爲牽世務中心若有違京洛多妖
麗玉顏侔瓊蕤閑夜撫鳴琴惠音清且悲長歌
赴促節哀響逐高徽一唱萬夫歎再唱梁塵飛
思爲河曲鳥雙遊豐水湄

擬庭中有奇樹

歡交蘭時往迢迢匿音徽虞淵引絕景四節逝
若飛芳草久已茂佳人竟不歸躑躅遵林渚惠
風入我懷感物戀所歡採此欲貽誰

擬青青河畔草

靡靡江蘼草耀耀生河側皎皎彼妹女阿那當
軒織粲粲妖容姿灼灼華美色良人遊不歸偏
栖常隻翼空室來悲風中夜起歎息

擬涉江採芙蓉

上山採瓊蘂窮谷饒芳蘭採採不盈掬悠悠懷
所歡故鄉一何曠山川阻且難沈思鍾萬里躑
躑獨吟嘆

爲顧彥先贈婦二首

其一

辭家遠行遊悠悠三千里京洛多風塵素衣化
爲緇修身悼憂苦感念同懷子隆思亂心曲沈
懽滯不起歡沈難克興心亂誰爲理願假歸鴻
翼翻飛浙江汜

其二

東南有思婦長歎充幽闥借問歎何爲佳人眇
天末遊宦久不歸山川修且闊形影參商乖音
息曠不達離合非有常譬彼絃與箏願保金石
軀慰妾長飢渴

周夫人贈車騎

碎碎織細練當爲君作襦君行豈有顧憶君是
妾夫昔者得君書聞君在高平今時得君書聞
君在京城京城華麗鄉璀璨多異端男兒多遠
志豈知妾念君昔者與君別歲律薄將暮日月

五臺新詩卷三
一何速素秋墜湛露湛露何冉冉思君隨歲晚
對食不能食臨觴不能飯

艷歌行

扶桑升朝暉照我高臺端臺端多艷麗濬房出
清顏淑貌耀皎日惠心清且閑美目揚玉澤蛾
眉象翠翰鮮膚一何潤秀色若可食窈窕多容
儀婉美巧笑言暮春春服成粲粲綺與紈金雀
垂藻翹瓊珮結瑤璠方駕揚清塵濯足洛水瀾
藹藹風雲會佳人一何繁南崖充羅幕北渚盈
駟軒清川含藻景高岸被華丹馥馥芳袖揮泠

泠纖指彈悲歌吐清音雅韻播幽蘭丹脣含九
秋妍迹凌七盤赴曲迅驚鴻蹈節如集鸞綺態
隨顏變沈姿無定源俯仰紛阿那顧步咸可歎
遺芳結飛飈浮景映清湍冶容不足詠春遊良
可歎

前緩聲歌

遊仙聚靈族高會曾城阿長風萬里舉慶雲鬱
嵯峨宓妃興洛浦王韓起秦華北徵瑤臺女南
要湘川娥肅肅霄駕動翩翩翠蓋羅羽旗栖瓊
鸞玉衡吐鳴和太容揮高絃洪崖發清歌獻酬

既已周輕軒乘紫霞惚轡扶桑枝濯足暘谷波
清暉溢天門垂慶惠皇家

塘上行

江籬生幽渚微芳不足宣被蒙風雲會移居華
池邊發藻玉臺下垂影滄浪淵沾潤既已渥結
根與且堅四節逝不處繁華難久鮮淑氣與時
殞餘芳隨風捐天道有遷易人理無常全男懽
智傾愚女愛衰避妍不惜微軀退但惧蒼蠅前
願君廣末光照妾薄暮年

爲顧彥先贈婦四首

陸雲

其一

我在三川陽子居五湖陰山海一何曠譬彼飛
與沉目想清惠姿耳存淑媚音獨寐多遠念寢
言撫空衿彼美同懷子非爾誰爲心

其二

悠悠君行邁煢煢妾獨止山河安可踰永路隔
萬里京室多妖冶粲粲都人子雅步擢纖腰巧
笑發皓齒佳麗良可羨衰賤焉足紀遠蒙眷顧
言銜恩非望始

其三

翩翩飛蓬征郁郁寒木榮遊止固殊性浮沉豈
一情隆愛結在昔信誓貫三靈秉心金石固豈
從時俗傾美目逝不顧纖腰徒盈盈何用結中
款仰指北辰星

其四

浮海難爲水遊林難爲觀容色貴及時朝華忌
日晏皎皎彼妹子灼灼懷春粲西城善雅舞總
章饒清彈鳴簧發丹脣朱絃繞素腕輕裾猶電
揮雙袂如霞散華容溢藻幄哀響入雲漢知音
世所稀非君誰能讚棄置北辰星問此玄龍煥

時暮復何言華落理必賤

雜詩

張協

秋夜涼風起清氣蕩暄濁蜻蛚吟堦下飛蛾拂
明燭君子從遠役佳人守螢獨離居幾何時鑽
燧忽改木房櫳無行迹庭草萋已綠青苔依空
牆蜘蛛網四屋感物多所懷沈憂結心曲

合歡詩二首

楊方

其一

虎嘯谷風起龍躍景雲浮同聲好相應同氣自
相求我情與子親譬如形追軀食共並根穗飲

共連理孟衣共雙絲絹寢共無縫裯居願接膝
坐行願攜手遊子靜我不動子遊我無留齊彼
同心鳥譬此比目魚情至斷金石膠漆未爲牢
但願長無別合形作一軀生爲併身物死爲同
擲灰秦氏自言至我情不可儔

其二

磁石引長針陽燧下炎烟宮商聲相和心同自
相親我情與子合亦如影追身寢共織成彼絮
用同功綿暑搖比翼扇寒坐併肩羶子笑我必
哂子感我無懼來與子共迹去與子同塵齊彼

蛩蛩獸舉動不相捐唯願長無別合形作一身
生有同室好死成併棺民徐氏自言至我情不
可陳

雜詩 三首

其一

獨坐空室中愁有數千端悲響荅愁歎哀涕應
苦心彷徨四顧望白日入西山不覩佳人來但
見飛鳥還飛鳥亦何樂夕宿自作群

其二

飛黃銜長轡翼翼回輕輪俯涉淶水澗仰過九

層山修途曲且險秋草生兩邊黃華如沓金白
花如散銀青敷羅翠彩絳葩象赤雲爰有承露
枝紫榮合素芬扶踈垂清藻布翹芳且鮮目爲
艷彩迴心爲竒色旋撫心悼孤客俯仰還自憐
踟躕向壁歎攬筆作此文

其三

南林有竒樹承春挺素華豐翹被長條綠葉蔽
朱柯因風吐徽音芳氣入紫霞我心羨此木願
徙著余家夕得遊其下朝得弄其葩爾根深且
堅余宅淺且洿移植無良期歎息將何如

七夕觀織女

王鑑

牽牛悲殊館織女怨離家一稔期一霄此期良
可嘉赫弈玄門開飛閣鬱嵯峩隱隱驅千乘閭
闔越星河六龍奮瑤轡文螭負瓊車火丹乘塊
燭素女執瓊華絳旗若吐電朱盖如振霞雲韶
何嘈噉靈鼓鳴相和亭軒佇高盼眷予在岌峩
澤因芳露沾恩附蘭風加明發相從遊翩翩鸞
鷲羅同遊不同觀念子遊怨多敬因三祝未以
爾屬皇娥

嘲友人

李克

同好齊歡愛纏綿一何深子既識我情我亦知
子心嫵婉歷年歲和樂如瑟琴良辰不我俱中
闊似商參爾隔北山陽我分南川陰嘉會罔克
從積思安可任目想妍麗姿耳存清媚音修晝
興永念遙夜獨悲吟逝將尋行役言別涕沾襟
願爾降玉趾一顧重千金

夜聽擣衣

曹毗

寒興御紈素佳人理衣衾冬夜清且永皓月照
堂陰纖手疊輕素朗杵叩鳴砧清風流繁節廻
飈灑微吟嗟此嘉運速悼彼幽滯心二物感余

懷豈但聲與音

擬古詩

陶潛

日暮天無雲春風扇微和佳人美清夜達曙酣
且歌歌竟長歎息持此感人多明明雲間月灼
灼葉中花豈無一時好不爰當如何

玉臺新詠卷三終

玉臺新詠卷四目錄

陳東海徐陵編

荀景

擬相逢狹路間

擬青青河邊草

王徽

雜詩一首

謝惠連

七月七日詠牛女

擣衣

代古

劉鑠

擬行行重行行

擬明月何皎皎

王擬孟冬寒氣至

擬青青河邊草

詠牛女

王僧達

七夕月下

顏延年

為織女贈牽牛

秋胡九首

鮑昭

翫月城西門解中

吳煌煌京洛行

擬白頭吟

王朗月行

東門行

採桑詩

夢還詩

擬古

詠雙燕

贈故人馬子喬 二首

王素

學阮步兵體

吳邁遠

飛來雙白鵠

陽春曲

長別離

長相思

鮑令暉

擬青青河畔草

擬客從遠方來

寄行人

古意贈今人

代葛沙門妻郭小玉作 二首

丘巨源

詠七寶扇

聽隣妓

王融

王古意二首

詠琵琶

詠幔

巫山高

芳樹

迴文詩

蕭諮議西上夜禁

謝朓

贈王主簿二首

和王主簿怨情

夜聽妓二首

銅雀臺妓

詠邯鄲故才人嫁為廝養卒婦

秋夜

贈故人

別江水曹

離夜詩

詠燈

詠燭

詠席

玉臺新詠卷四目錄
四
詠鏡臺

詠竹火籠

落梅

陸厥

中山王孺子妾歌

邯鄲行

虞羲

自君之出矣

玉臺新詠卷四目錄終

玉臺新詠卷四

陳東海徐陵編

明歛方大法校

擬相逢狹路間

荀景

朝發邯鄲邑暮宿井陘間井陘一何狹車馬不
得旋邂逅相逢值崎嶇交一言一言不容多伏
軾問君家君家誠易知易知復易博南面平原
居北趣相如閣飛樓臨名都通門枕華郭入門
無所見但見雙栖鶴栖鶴數十雙鴛鴦群相追
大兄珥金璫中兄振纓綉伏臘一來歸隣里生
光輝小弟無所作閩雞東陌達大婦織紈綺中

婦縫羅衣小婦無所作挾瑟弄音徽丈人且却
坐梁塵將欲飛

擬青青河邊草

熒熒山上火茗茗隔隴左隴左不可至精爽通
寤寐寤寐衾幃同忽覺在他邦他邦各異邑相
逐不相及迷墟在望烟木落知冰堅升朝各自
進誰肯相攀牽客從北方來遺我端弋綈命僕
開弋綈中有隱起珪長跪讀隱珪辭苦聲亦悽
上言各努力下言長相懷

雜詩二首

王徽

其一

桑妾獨何懷傾筐未盈把自言悲苦多排却不
肯捨妾悲四陳訴填憂不銷治寒鴈歸所從半
塗失憑假壯情抃驅馳猛氣捍朝社常懷雲漢
慙常欲復周雅重名好銘勒輕軀願圖寫萬里
度沙漠懸師蹈朔野傳聞兵失利不見來歸者
奚處理旂麾何處喪車馬拊心悼恭人零淚覆
面下徒謂久別離不見長孤寡寂寂掩高門寥
寥空廣廈待君竟不歸收顏今就價

其二

思婦臨高臺長想憑華軒弄絃不成曲哀歌送
苦言箕箒留江介良人處鴈門詎憶無衣苦但
知狐白溫日暗牛羊下野雀蒲空園孟冬寒風
起東壁正中昏朱火獨照人抱景自愁怨誰知
心曲亂所思不可論

七月七日詠牛女

謝惠連

落日隱簷楹升月照房櫳團團蒲葉露浙浙振
條風蹠足循廣塗瞬目矚曾窮雲漢有靈匹彌
年闕相從遐川阻睽愛修渚曠清容弄杼不成
藻聳轡驚前縱昔離秋已兩今聚夕無雙傾河

易迴幹欵顏難久悰沃若靈駕旋寂寥雲幄空
留情顧華寢遙心逐奔龍沈吟爲爾感情深意
彌重

擣衣

衡紀無淹度晷運倏如催白露滋園菊秋風落
庭槐肅肅莎雞羽烈烈寒蟬啼夕陰結空幙霄
月皓中閨美人戒裳服端飾相招携簪玉出北
房鳴金步南階欄高砧響發楹長杵聲哀微芳
起兩袖輕汗染雙題紈素旣已成君子行未歸
裁用笥中刀縫爲萬里衣盈筐自予手幽絨俟

君開腰帶准疇昔不知今是非

代古

客從遠方來贈我鵠文綾貯以相思篋絨以同心繩裁爲親身服着以俱寢興別來經年歲歡心不可凌瀉酒置井中誰能辯斗升合如杯中水誰能判淄澠

擬行行重行行

劉鑠

眇眇凌長道遙遙行遠之廻車背京邑揮手從此辭堂上流塵生庭中綠草滋寒蟿翔水曲秋兔依山基芳年有華月佳人無還期日夕涼風

起對酒長相思悲發江南調憂委子衿詩卧看明燈晦坐見輕紈縑淚容不可飾幽鏡難復治願垂薄暮景照妾桑榆時

擬明月何皎皎

落宿半遙城浮雲藹曾闕玉宇來清風羅帳延秋月結思想伊人沉憂懷明發誰謂行客又屢見流芳歇河廣川無梁山高路難越

擬孟冬寒氣至

白露秋風始秋風明月初明月照高樓白露皎玄除迨及涼風起行見寒林踈客從遠方至贈

我千里書先叙懷舊愛未陳久離居一章意不
盡三復情有餘願遂平生志無使其言虛

擬青青河邊草

淒淒含露臺蕭蕭迎風館思女御櫺軒哀心徹
雲漢端撫悲絃泣獨對明燈嘆良人久遙役耿
介終昏日楚楚秋水歌依依採菱彈

詠牛女

秋動清風扇火移炎氣歇廣欄含夜陰高軒通
夕月安步巡芳林傾望極雲闕組幕縈漢陳龍
駕凌霄發誰云長河遙頗覺促筵悅沉情未申

寫飛光已飄忽來對眇難期今歡自茲沒

七夕月下

王僧達

遠山歛雲侵廣庭揚月波氣往風集隙秋還露
泫柯節氣既已孱中霄振綺羅來歡詎終夕收
淚泣分河

爲織女贈牽牛

顏延年

婺女儷經星嫦娥棲飛月慙無二媛靈託身侍
天闕閭闔殊朱暉咸池豈沐髮漢陰不夕張長
河爲誰越雖有促讌期方湏涼風發虛計雙曜
周空遲三星沒非怨杼軸勞但念芳菲歇

秋胡九首

其一

倚梧傾高鳳寒谷待鳴律
影響豈不懷自遠每相匹
婉彼幽閑女作嬪君子室
峻節貫秋霜明艷侔朝日
嘉運旣我從欣願自此畢

其二

燕居未及歡良人顧有違
脫巾千里外結綬登王畿
戒塗在昧旦左右來相依
驅車出郊郭行路正威遲
存爲久離別沒爲長不歸

其三

嗟余怨行役三陟窮晨暮
嚴駕越風寒解鞍犯霜露
原隰多悲涼迴飈卷高樹
離獸起荒蹊驚鳥縱橫去
悲哉遊宦子勞此山川路

其四

迢遙行人遠婉轉年運徂
良時爲此別日月方尙除
孰知寒暑積僂俛見榮枯
歲暮臨空房涼風起坐隅
寢興日已寒白露生庭蕪

其五

勤役從歸願反路遵山河
昔辭秋未素今也歲載華
蚤月觀時暇桑野多經過
佳人從所務窈

五臺新詠卷四
六
窈援高柯傾城誰不顧彌節停中阿

其六

年往誠思勞路遠闊音形雖爲五載別相與昧
平生捨車遵往路鳧藻馳目成南金豈不重聊
自意所輕義心多苦調密比金玉聲

其七

高節難久淹竭來空復辭遲遲前途盡依依造
門基上堂拜嘉慶入室問所之日暮行採歸物
色桑榆時美人望昏至慙嘆前相持

其八

有懷誰能已聊用申苦難離居殊年歲一別阻
河關春來無時豫秋至恒早寒明發動愁心閨
中起長嘆慘悽歲方晏日落遊子顏

其九

高張生絕絃聲急由調起自昔枉光塵結言固
終始如何久爲別百行愆諸已君子失明義誰
與借沒齒愧彼行露詩甘之長川汜

自公
翫月城西門解中

鮑昭

始見西南樓纖纖如玉鈎末映東北墀娟娟似
蛾眉蛾眉蔽朱櫳玉鈎隔綺窓三五二八時千

里與君同夜移衡漢落徘徊惟幌中歸華先委
露別葉早辭風客遊厭辛苦仕子倦飄塵休澣
自公日宴慰及私晨蜀琴抽白雪郢曲繞陽春
肴乾酒未缺金壺啓夕淪迴軒駐輕蓋留酌待
情人

煌煌京洛行

鳳樓十二重四戶八綺窓繡栊金蓮花柱玉
盤龍珠簾無隔露羅幌不勝風寶帳三千所爲
爾一朝容揚芬紫烟上垂綵綠雲中春吹迴白
日霜歌落塞鴻但懼秋塵起盛愛逐衰蓬坐視
青苔蒲卧對錦筵空琴瑟縱橫散舞衣不復縫
古來皆歇薄君意豈獨濃唯見雙黃鵠千里一
相從

擬白頭吟

直如朱絲繩清如玉壺冰何慙宿昔意猜恨坐
相仍人情賤恩舊世議逐衰興毫髮一爲瑕丘
山不可勝食苗實碩鼠點白信蒼蠅鳧鵠遠成
美薪菊前見凌申黜褒女進班去趙姬昇周王
日淪惑漢帝益嗟稱心賞猶難恃貌恭豈易憑
古來共如此非君獨撫膺

古本共朗月行

朗月出東山照我綺窓前窓中多佳人被服妖
且妍靚妝坐帷袖當戶弄清絃鬢奮衛女迅體
絕飛燕先爲君歌一曲當作朗月篇酒至顏自
解聲和心亦宣千金何足重所存意氣間

東門行

傷禽惡絃驚倦客惡離聲離聲斷客情賓御皆
涕零涕零心斷絕將去還復訣一息不相知何
况異鄉別遙遙征駕遠杳杳白日晚居人掩閨
卧行子中夜飯野風吹草木行子心腸斷食梅

常苦酸衣葛常苦寒絲竹徒蒲座憂人不解顏
長歌欲自慰彌起長恨端

採桑詩

季春梅始落女工事蚕作採桑淇洧間還戲上
宮閣早蒲時結陰晚篁初解籜藹藹霧蒲閨融
融景盈幕乳燕逐草虫巢蜂拾花萼景節最暄
妍佳服又新爍歛嘆對迥塗楊歌弄塲藿抽琴
拭紵思薦珮果成託承君郢中美服義又心諾
衛風古愉艷鄭俗舊浮薄虛願悲渡湘宓賦笑
漣洛盛明難重來淵意爲誰涸君其且調絃桂

酒妾行酌

南風十夢還詩

銜淚出郭門撫劍無人遠沙風閣塞起離心眷
鄉畿夜分就孤枕夢想暫言歸孀婦當戶歎縲
絲復鳴機慊歎論久別相將還綺幃歷歷簷下
涼隴窓裏暉刈蘭爭芬芳採菊競葳蕤開奩
集香蘇探袖解纓徽寐中長路近覺後大江違
驚起空歎息恍惚神魂飛白水漫漫浩浩高山壯
巍巍波潮異徃復風雲改榮衰此土非吾土慷
慨當訴誰

擬古

河畔草未黃胡鷹已矯翼秋虫挾戶吟寒婦成
夜織去歲征人還流傳舊相識聞君上隴時東
望久歎息宿昔改衣帶日暮異容色念此憂如
何夜長愁更多明鏡塵匣中寶瑟生網羅

詠雙燕

雙燕戲雲崖羽翮始差池出入南閨裏經過北
堂陸意欲巢君幕層楹不可窺沉吟芳歲晚徘
徊韶景移悲歌辭舊愛銜泥覓新知

贈故人馬子喬二首

寒灰滅更燃夕華晨更鮮春水雖暫解冬冰還
復堅佳人捨我去賞愛長絕緣歡至不留時每
念輒傷年

其一

其二

雙劍將別離先在匣中鳴煙雨交將夕從此遂
分形雌沉吳江水雄飛入楚城吳江深無底楚
闕有崇扃一爲天地別豈直限幽明神物終不
隔千祀儻還并

學阮步兵體

王素

沉情發遐慮紆鬱懷所思髮髯聞簫管鳴鳳接
羸姬聯綿共雲翼嫵婉相携持寄言芳華士寵
利不常期涇渭分清濁視彼國風詩

飛來雙白鵠

吳邁遠

可憐雙白鵠雙雙絕塵氛連翩弄光景交頸遊
青雲逢羅復逢繳雌雄一旦分哀聲流海曲孤
叫絕江濱豈不慕前侶爲爾不及羣步步一零
淚千里猶待君樂哉新相知悲矣生別離持此
百年命共逐寸陰移譬如空山草零落心自知

陽春曲

百里望咸陽知是帝京邑綠樹搖雲光春城起
風色佳人愛華景流靡園塘側妍姿艷月映羅
衣飄蟬翼宋玉歌陽春巴人長歎息雅鄭不同
賞那令君愴惻生平重愛惠私自憐何極

長別離

生離不可聞况復長相思如何與君別當我盛
年時蕙花每搖蕩妾心空自持榮之草木歡悴
極霜露悲富貴貌難變貧賤顏易衰持此斷君
腸君亦且自疑淮陰有逸將折羽謝翻飛楚有
扛鼎士出門不得歸正爲隆準公杖劍入紫微
君才定何如白日不爭暉

長相思

晨有行路客依依造門端人馬風塵色知從河
塞還時我有同栖結宦遊邯鄲將不異客子分
飢復共寒煩君尺帛書寸心從此殫道妾長憔悴
豈復歌笑顏簷隱千霜樹庭枯十載蘭經春
不舉袖秋落寧復看一見願道意君門已九關
虞卿棄相印檐笠爲同歡閨陰欲早霜何事空
盤桓

擬青青河畔草

鮑令暉

裊裊臨窓竹，藹藹垂門桐。灼灼青軒女，泠泠高
堂中。明志逸秋霜，玉顏掩春紅。人生誰不別，恨
君早從戎。鳴絃慙夜月，緝黛羞春風。

擬客從遠方來

客從遠方來，贈我漆鳴琴。木有相思文，絃有別
離音。終身執此調，歲寒不改心。願作陽春曲，宮
商長相尋。

寄人行

自君之出矣，臨軒不解顏。砧杵夜不發，高門晝
常關。帳中流熠燿，庭前華紫蘭。楊枯識節異，鴻

來知客寒。遊暮冬，盡月除春待君還。

古意贈今人

寒鄉無異服，氊褐代文練。月月望君歸，年年不
解纒。荆楊春早和，幽冀猶霜霰。北寒妾已知，南
心君不見。誰爲道辛苦，寄情雙飛燕。形迫杼煎
絲，顏落風催電。容華一朝改，唯餘心不變。

代葛沙門妻郭小玉作二首

其一

明月何皎皎，皎垂幌照羅茵。若共相思夜，知同憂
怨晨。芳華豈矜貌，霜露不憐人。君非青雲逝，飄

迹事咸秦妾持一生淚經秋復度春

其二

君子將遙役遺我雙題錦臨當欲去時復留相
思枕題用常著心枕以憶同寢行行日已遠轉
覺思彌甚

詠七寶扇

丘巨源

妙縞貴東夏巧媛出吳闈裁如白玉璧縫似明
月輪表裏鏤七寶中銜駭雞珍畫作景山樹圖
爲河洛神來延揮握玩入與鑲釧親生風長袖
際晞華紅粉津拂眄迎嬌意隱映含歌人特移
務忘故節改競存新卷情隨象簞舒心謝錦茵
厭歎何足道敬哉先後晨

聽隣妓

披衽乏遊術憑軾寡文才蓬門長自寂虛席視
生埃貴里臨倡館東隣歌吹臺雲間嬌響徹風
末艷聲來飛華瑤翠幄揚芬金碧盃久絕中州
美從念戶鄉灰遺情悲近世中山安在哉

古意二首

王融

其一

遊禽暮知返行人獨不歸坐銷芳草氣空度明

月輝嘖容入朝鏡思淚點春衣巫山綉雲沒淇
上綠楊稀待君竟不至秋鴈雙雙飛

其二

霜氣下孟津秋風度函谷念君淒已寒當軒卷
羅縠織手廢裁縫曲鬢罷膏沐千里不相聞寸
心鬱氛氲况復飛螢夜木葉亂紛紛

詠琵琶

抱月如可明懷風殊復清絲中傳意緒花裏寄
春情掩抑有竒態悽鏘多好聲芳袖幸時拂龍
門空自生

詠幔

幸得與珠綴幕歷君之楹月映不辭卷風來輒
自輕每聚金鑪氣時駐玉琴聲但願置尊酒蘭
缸當夜明

巫山高

想像巫山高薄暮陽臺曲烟霞乍舒卷蘅芳自
斷續彼美如可期寤言紛在矚憮然坐相思秋
風下庭綠

入下
芳樹

相望早春日煙華雜如霧復此佳麗人含情結

芳樹綺羅已自憐
萱風多有趣
去來徘徊者
佳人不可遇

迴文詩

枝大柳塞北
葉暗榆關東
垂條逐絮轉
落葉散花叢
池蓮照曉月
幔錦拂朝風
低吹雜綸羽
薄粉艷粧紅
離情隔遠道
歎結深閨中

蕭諮議西上夜禁

徘徊將所愛
惜別在河梁
衿袖三春隔
江山千里長
寸心無遠近
邊地有風霜
勉哉勤歲暮
敬矣慎容光
山中殊未懌
杜若空自芳

贈王主簿二首

謝朓

其一

日落窓中坐
紅粧好顏色
舞衣襞未縫
流黃覆不織
蜻蛉草際飛
遊蜂花上食
一遇長相思
願寄連翩翼

其二

清吹要碧玉
調絃命綠珠
輕歌急綺帶
含笑解羅襦
餘曲詎幾許
高駕且踟蹰
徘徊憐暮景
惟有洛城隅

和王主簿怨情

掖庭聘絕國長門失懽讌相逢詠薜蘿燕辭寵悲
團扇花叢亂數蝶風簾入雙燕徒使春帶賒坐
惜紅粧變平生一顧重夙昔千金賤故人心尚
爾故心人不見

夜聽妓二首

其一

瓊閨釧響聞瑤席芳塵滿要取洛陽人共命江
南管情多舞態遲意傾歌弄緩知君密見親才
心傳玉腕

其二

上客光四座佳麗直千金掛釵報纓絕墮珥苔
琴心蛾眉已共笑清香復入衿歡樂夜方靜翠
帳垂沉沉

銅雀臺妓

總緯飄井幹樽酒若平生鬱鬱西陵樹詎聞歌
吹聲芳襟染淚迹嬋媛空復情玉座猶寂寞况
乃妾身輕

詠邯鄲故才人嫁爲廝養卒婦

生平宮閣裏出入侍丹墀開筭方羅縠窺鏡比
蛾眉初別意未解去又日生悲顛顛不自識嬌

羞餘故姿夢中忽髮髯猶言承讌私

秋夜

秋夜促織鳴南隣擣衣急思君隔九重夜夜空
佇立北窓輕幔垂西戶月光入何知白露下坐
視前堦濕誰能長分居秋盡冬復及

贈故人

芳洲有杜若可以慰佳期望望忽超遠何由見
所思我行未千里山川已間之離居方歲月佳
人不在茲清風動簾夜孤月照窓時安得同携
手酌酒賦新詩

別江水曹

山中上芳月故人清樽賞遠山翠百重迴流映
千丈花枝聚如雪垂藤散似網別後能相思何
嗟異風壤

離夜詩

玉繩隱高樹斜漢映層臺離堂華燭盡別幌清
琴哀翻潮尚知恨客思眇難裁山川不可盡况
乃故人杯

詠燈

發翠斜漢裏蓄寶宕山峯抽莖數仙掌銜光似

燭龍飛蛾再三繞輕花四五重孤對相思夕空
照舞衣縫

詠燭

杏梁賓未散桂宮明欲沉暖色輕帷裏低光照
寶琴徘徊雲髻影灼爍綺踈金恨君秋月夜遺
我洞房陰

詠席

本生朝夕池落景照參差汀洲蔽杜若幽渚奪
江籬遇君時採擷玉座奉金卮但願羅衣拂無
使素塵彌

詠鏡臺

玲瓏類丹檻茗亭似玄闕對鳳懸清冰垂龍掛
明月照粉拂紅粧插花理雲髮玉顏徒自見常
畏君情歇

詠竹火籠

庭雪亂如花井冰粲成玉因炎入貂袖懷溫奉
芳蓐體密用宜通文斜性非曲暫承君王旨請
謝陽春旭

落梅

新葉何冉冉初葢新霏霏逢君後園讌相隨巧

笑歸親勞君王指擿以贈南威用持插雲髻翡翠比光輝日暮長零落君恩不可追

中山王孺子妾歌

陸厥

如姬卧寢內班妾坐同車洪波陪飲帳林光宴秦餘歲暮寒飈及秋水落芙蓉子瑕矯後駕安陵泣前魚賤妾終已矣君子定焉如

邯鄲行

趙女擗鳴琴邯鄲紛躡步長袖曳三街蕪金輕一顧有美獨臨風佳人在遐路相思欲褰社叢臺日已暮

自君之出矣

虞羲

自君之出矣楊柳正依依君出無消息惟見黃鸝飛關山多險阻士馬少光輝流年無止極君去何時歸

玉臺新詠卷四終



原件短缺

卷5-8

